

հանելուկը: Ուրախ էր եւ վախում էր: Նա արագացրեց իր քայլերը, անցաւ անտառը, բըլուրների վրայից վազելով զնաց եւ՝ երբ հասաւ իր նշանածի տունը, ամէն բան պարզուեց: Նշանածը այն հրեշտակային էակը չէր, աւա՛ղ, որին նա երազել էր: Այսօր, նա նրան տեղ երեւցաւ, աւելի պառաւ, հոգեկան թռիչքից գուրկ մի անձնաւորութիւն:

Մարդը հասկացաւ, որ երազած եւ իրական կանանց միջեւ մեծ տարբերութիւն կայ:

— Ո՛հ, միամիտ մարդ,— փափսաց նրա ականջին ճանապարհի երազը,— հասկացիր, հասկացիր վերջապէս, որ կինը այն չէ ինչ որ մեզ թւում է: Գու սիրում էիր քո երազը նրա մէջ, եւ ես ահա քո երազը եմ, քեզանից անբաժանելի, քայլիդ հետ քայլ, աչքիդ հետ աչք:

Այդպէս ցեղը քանդակել է մեր մէջ իր մտքի արձանը:

Մեր երակների, մեր դնդերի եւ մեր սրտի մէջ ծփում է յիշատակների ուկիանը: Համր ալիքների կատարին հոգիս տարածում է իր թաղուած ալիքին, ու մենք, բնագոյրէն, ճրգտում ենք զէպի երազի մագնիսացած բեւեռը, զէպի մեր կարելիութիւնների ամբողջական իրականացումը ու դարնում ենք ժայռերին:

Հրդեհների միջից, ողբերգութիւնների կենարոնում կանգնած, մենք որոնում ենք այն լոյսը, «որը կարելի է յառել մինչեւ վերջը», եւ մենք, զժբախտ նշանախօսներս, չենք նըշմարում մեղմածեմ սիրեցեալը, որ մեր քայլի հետ քայլ է, աչքի հետ աչք:

Արժէ՞ դնալ էջմիածին:
* * *

Երեք տարի առաջ, զնացել էի հոգեկան բոլորովին տարբեր արամադրութիւններով:

էջմիածինը ինձ համար պատմութիւն էր, դեռ ողջ մնացած Զուարթնոց: Մանկական յիշատակների հետ խոնոտած աւետարանի հեռաւոր բուրում, եպիսկոպոսական փարթամ շքեղութիւն, կրակի վրայ մատուցուած խոնկ, մեխամազճոտ շարական ու դրա հետ միասին, գեղադիտական հետաքրքրութիւն՝ Հոփսիմէն, Նաղաշի նաղչերը, արծաթէ իրերը եւ կաթողիկոսը:

էջմիածինը պարզ գիրք էր, որի մէջ մատչելի տառերով ամէն ինչ գրուած էր: Մի տեսակ գեղեցիկ առասպել՝ մարած արծաթի վը-

րայ ոսկէ թելերով հիւսուած, թափթփած թեւերով հրեշտակ, սուրբեր —

Այնպէս ինչպէս քեզ գծեցին
Անյայտ ձեռքեր՝
Մագաղաթի թօշնած կողքին .
Նշանման մեծ աչքերով,
Կարմիր քղամիդ
Լայն ծալքերով
Եւ դօտիով զարդ ի զարդ,
Ուր մեղեհիկ, ուր սուտակ
Վառ են տժգոյն բոցերով:

էջմիածինը պատմութիւն էր: Ես էլ հնագէտ եւ գեղագէտ, որ գնում էի գեղեցիկը փնտռելու անցեալի մէջ:

Երբ հասայ, երեկոյ էր: Մինչ Գարեգին Արքազանը իր բնակարանի առջև սիրալիւր ողջոյն էր տալիս, իր բիբերի մէջ վերաջալոյսը կայծեր էր գետեղում եւ եկեղեցւոյ խաչը բուռնկել էր ջահի նման:

Գիշերը անցրինք գրքերի շուրջը: Սրբազանը, գիտուն գեղագէտ, հմուտ պատմաբան, ցոյց էր տալիս իր հսկայ աշխատութիւնները հայ մանրանկարչութեան շուրջը եւ վեր հանում այն զմայլելի արժէքները, որ մեր նախնիք ստեղծած են եւ որոնք մեզ համար իսկ մընում են մինչեւ հիմա անյայտ: Ու հայ, գեղջուկ տարազները արհաւիրքներից փախչող կանանց վրայից հանած, միամիտ զարդերը արծաթի եւ ոսկիի մէջ փորագրուած, գոյնզգոյն թելերի նրբազին հիւսքը շապիկների վրայ փունջ փունջ կախուած, աւեր տունների միջից, մի քիչ բերկրանք ու հմայք էին մատուցում մեզ, վանական խուցի ազտոտ լամբարի տակ:

Մտածե՛լ, ի՞նչ անողոք բան է գեղեցկութեան սէրը:

Այստեղ, մի տարի առաջ, մի քանի տասնեակ հաղար դաղթականներ, բոլորուած վանքի շուրջը սարսափի ճիրանների մէջ տառապում էին. ցրտի, սովի, տենդի դէմ գերմարդկային պայքար մղում, սառը ձիւնի վրայ մեռնում հարիւրներով...

Մահուան այս ողբերգական կարաւանը, յուսահատ եւ սարսափահար, կանգնել էր այստեղ եւ դղրդիւն հառաչ էր արձակում ճակատադրի դէմ, խուլ տնոց, աղմկալից անէծք: Նա բերել էր իրեն հետ Հայաստանի գաւառների ահաւոր մահուան յիշատակը, քանդուած